

弘

簡

錄

弘簡錄卷二百三十五

明刑部員外郎仁和弘齋邵經邦學

皇清翰林院侍講學士四世孫遠平校閱

載記 金侍從一

范拱 趙興祥 獨吉義 耶律恕 耶律安禮

納合椿年 溫廸罕締達 子二十 孟浩 附四 子貴質 敦王中安

蔡松年 子正 曹望之 梁肅 移刺道 蘇保衡

翟永固 張景仁 張用直 魏子平 蒲察通

李木魯阿魯罕

范拱字清叔濟南人九歲能屬文既長深于易學登宋末進士
調廣濟軍曹辟權邦彥掌書記攝學事嘗獻劉豫六箴及撰謁
廟文豫奇之深加賞識齊國建累擢中書舍人上初政十五篇

得民命將簡理納諫遠圖治亂舉賢守令延問畏慎節祥瑞戒
雷同用人御將御軍豫納其說不能盡用久之權尚書右丞進
左丞兼門下侍郎兄巽亦任侍郎與右相張孝純極論當時哀
歛煩急刑法嚴峻吏責緣爲暴境內苦之請仍因履畝之法像
不從巽坐貶官自是無敢言者拱恐言之則爲黨兄不言百姓
又困且吾執政寧忍坐視乃上疏大略以爲國家懲亡宋重歛
之弊什一稅民本務優恤官吏奉行太急驅民犯禁非長久計
也豫不加譴責仍令刑部條上諸路以稅抵罪者凡千餘人豫
見其多乃更爲五等稅法民猶以爲重齊國廢言于梁王宗弼
減舊二分之一民始蘇息未幾以病乞外除淄州刺史皇統四
年加通議大夫致仕齊居讀書罕對妻子世宗在濟南聞其名
大定初因上封事七年召赴闕除太常卿預郊祀議有言前代

都長安及汴洛以太華等山列爲五嶽今旣都燕當別議五嶽
名寺僚取嵩高疏周都鄆鎬以吳嶽爲西岳拱議其非奏軒轅
居上谷在恒山之西舜居蒲坂在華山之北以此言之未嘗據
所都而改岳祀也後遂不改九年復致仕卒于家年七十四拱
爲人慎許可其議論確然不可移奪嘗言禮官當守禮法官當
守法若漢張釋之可謂能守法矣所薦拔多名士若李南張輔
劉長言自汝州郟城酒監擢省郎人不知其所以進拱亦不自
言也

趙興祥平州廬龍人遼太師思溫六世孫父瑾遼靜江軍節度
使以陰補閤門祗候素有孝行謁告省親于白霄會土賊據郡
作亂攜母及弟妹奔燕京不能進乃自柳城涉砂磧夜視星斗
而行僅達遼軍因不知主所向復還柳城婁室破遼始得歸國

從宗望伐宋爲六宅使天眷初累官宣徽院同知母憂去官熙
宗特命起復護視英悼太子轉右宣徽使天德初改左海陵先
賜玉帶諭以汝官雖未至一品可佩此以待立問欲使子弟爲
官當自言俱辭謝不敢俄除濟南尹賜車馬金幣金銀器皿改
絳陽軍節度使召爲太子少保累封廣平鉅鹿二郡王正隆例
奪爲申國公遷太子少傅改定武軍節度海陵伐宋以二子從
軍先見世宗于平州嘉其誠款以爲秘書監復左宣徽使語以
俸祿出于百姓不可妄費尚食庖人很多徒費糜祿可約量減
損朕在藩邸時家務皆委執事者自卽位以來事皆留心近臣
有獻琵琶上却之詔興祥諭以朕憂勞天下未嘗以聲技爲心
自今勿復有獻有司奏南北邊事未息恐財用未給乞罷修禱
龍殿涼位工役上卽日使興祥傳詔罷之久之以其孫珣爲閣

門祗候十五年從上幸安州眷水賜銀五百兩至良鄉賦風賦
賜醫藥未幾卒

獨吉義本名鴆魯補曷速館人徙居遼陽之阿米吉山祖回海
父祕刺生三子義居季收國二年曷速館來附領戶三百遂爲
謀克及死仲子忽史欲承襲其職義曰長兄雖異母不可奪也
忽史乃以謀克歸長子照屋人咸義之後爲質子至上京善女
直契丹字爲管勾御前文字天會十五年擢右監門衛大將軍
除寧化州刺史察廉累遷迭刺并卓魯二部族節度使復州防
禦使河南路統軍都監又改武勝軍邊郡妄稱寇至徙居民于
汴內外騷動義曰太師梁王南伐淮南死者未葬亡者未復彼
豈敢先發此城中有權塲若自動彼將謂我無人旣而果無事
統軍司使人謝之請以沿邊唐州等處諸軍猛安皆隸焉貞元

元年改唐古部族節度使歷彰化利涉二軍因預白彥敬密謀共圖世宗及後來歸不諱其事語在紇石烈志寧傳世宗嘉其不欺拜爲參知政事密與義言正隆率諸道兵若反旆北指則計將安出義曰不然若陛下此舉太早則正隆可北向太遲恐窩幹又太熾今此時必將自斃何暇北圖雖然乘將士皆在南惟家屬居此願陛下早幸中都此爲上計上嘉納之行次榛子嶺聞海陵遇害謂義曰信如卿所料矣大定二年罷爲益都尹兼本路兵馬都總管賜金五十兩銀五百兩三年以疾致仕四年卒年七十一義性辯給善談論服玩不尚奢侈食不兼味子和尚大定初除應奉翰林文字與陀滿訛里也子撒曷斡克護衛司吏王得兒俱加保義校尉持詔書宣諭中都以南州郡及往南京諭太傅張浩坐擅廢置殺戮州縣官尚書省鞠治罷之

十九年詔以義孫引善爲斜魯答阿世襲謀克

耶律恕字忠厚本名釋里遼橫帳秦王之族爲人謹愿有志喜讀書通契丹大小字與耶律高八來歸隸婁室軍從宗翰伐宋爲前鋒取和尚原攻仙人關特爲宗輔所知除太原真定少尹撤離喝辟署陝西參謀委以軍務遷行臺兵部侍郎左司郎中海陵爲平章斌其有黨正色答曰窮則獨善其身達則兼善天下不以其道得之非恕之志也何朋黨之有久之爲沁南軍節度使遷行臺工部尚書罷改安國軍節度使入爲參知政事授太子少保以疾求解爲興中尹正隆元年封廣平郡王致仕卒年六十九贈銀青光祿大夫

耶律安禮本名納合系出遙輦氏幼孤事母盡孝迨季間關避難未嘗怠溫將禮入朝當路者重其行義使主帥府文字授左

班殿直天眷初從宗弼于山西母喪以大暑挽柩行千餘里哀毀骨立行路嗟嘆主師憐之贈禮甚厚服除歷行臺吏禮二部主事左司郎中天德間入爲工部侍郎遷尚書爲宋國賀正使被詔鞠韓王亨獄于廣寧還奏亨無反狀海陵怒疑爲宗弼故吏責之曰亨迭有三罪其論阿里山虎有誓券不當死旣引伏其謂不足進馬及密遣刺客二者安得無之汝等來奏欲測我喜怒以爲輕重耳乃遣安禮再往與李老僧同鞠之老僧由是殺亨于獄海陵猶謂安禮輕殺亨以絕滅事迹親戚咸得不坐其不附上刻下如此尋改吏部尚書旋大房山諸陵工作拜樞密副使封譚國公歷尚書左右丞進封鄜國公諫止伐江南并議降累朝功臣封爵忤海陵意罷爲南京留守改溫國公安禮長于吏事廉謹自將從帥府再伐宋寶貨人口一無所取貴爲

執政奴婢止數人皆有契券時議賢之薨年五十六

納合椿年本名烏野天會中初置女直字立學官于西京與紇石烈良弼俱遣入學最號警悟久之選諸學生送京師俾上京教授耶魯教之椿年在選中補尚書省令史累官監察御史殿中侍御史海陵爲相薦除右司員外郎編定新制海陵篡立以爲諫議大夫素有酒失因戒遂終身不復飲俄改秘書監修起居注授世襲猛安爲翰林學士兼御史中丞正隆初起上京詣猛安于中都山東等路安置以勞賜玉帶閑廐馬奉遷山陵還爲都點檢賜今名拜叅知政事海陵而論如卿史材難得復有如卿者乎因薦良弼未旬日諭以惟賢知賢吾試用良弼言行端正無所阿諂果如所言卿可謂能舉矣又曰常人多嫉勝已者卿獨屢以爲言其賢于人遠甚明年椿年卒海陵深爲悼惜

親臨哭之。追封特進譚國公。謚忠辯。賻銀綵錢絹以長子叅謀合爲定遠大將軍襲猛安。次子合答爲忠武校尉。椿年有宰相才好推轂。士類然。頗營產業爲子孫慮。大定中括檢田土。百姓陳言椿年子叅謀合與溫都思忠子長壽等三十餘家凡冒占西南路官田三千餘頃。世頗以此譏之。

溫廸罕締達自幼該習經史。長通女直字最號精深。賜以出身累官國史編修。令教女直學生習作詩策。若有文采量才任使。及設女直進士科。登第者多遷爲著作佐郎。與編修官宗壁尚書省譯史阿魯吏部令史張克忠譯解經書修撰移刺傑應奉移刺履講究其義。累遷秘書丞。大定十九年改左贊善。以母老求養。皇太子使內直丞六斤諭以父皇嘗言朕得一出倫之才。學問該貫。當令輔汝德義。今旣數月。自謂親炙道義。不勝其喜。

未可使去久之轉翰林待制竟卒明昌五年贈翰林學士承旨
諡曰文成 子二十章宗時爲符寶典書累官左諫議大夫貞
祐四年上疏略曰今邊備未撤征調不休州縣長吏不知愛養
其民苛責徵科鞭笞逼迫急于星火文移重複不勝其弊宜敕
有司務從簡易及兵興以來忠臣烈士孝子順孫義夫節婦湮
沒無聞者甚衆乞遣史官一員廣爲採訪以議褒嘉興定元年
遷武勝州節度使改吏部尚書知開封府坐縱軍人家屬降爲
鄭州防禦使卒

孟浩字浩然澤州人登遼末進士天會三年爲樞密院令史除
平州觀察判官天眷初遷入元帥府備任使承制除歸德少尹
充行臺吏禮部郎中與田穀吳毅皆有賢名韓企先爲相用穀
爲左司郎中浩爲員外郎穀爲吏部侍郎穀性剛正好評論人

物分別賢否既典選事授邢具瞻翰林待制所引用皆君子而蔡松年曹望之許霖皆小人求與毅相結不許反加毀短指與相善以爲朋黨會企先有疾宗弼來候問丞相年老且病後誰可繼者因舉毅以對而宗弼譖言先入答以此輩可誅斃後出毅爲橫海軍節度使既得除命有選人龔彝鑒除名值赦赴部得預覃恩乃例用月日署之工部員外郎張子周素怨毅微知其事嗾霖發之詆以私植黨與專擅朝政詔置獄擬毅與浩毅具贖王植高鳳庭王劬趙益典并龔鑒等三十四人皆徙海上天下知其寃後遇天德赦書人多物故惟浩與毅兄斂王補馮煦王中安在大定二年世宗召見復官浩爲侍御史轉右司員外郎斂大理丞補工部員外郎兵部主事中安知火山軍事浩素篤實遇事敢言無所隱諱上嘉其忠每對大臣稱之有疾求

外除祔州刺史致仕七年起爲御史中丞再闕月拜叅知政事
辭以不次之恩臣不敢當上曰國家用人豈拘階次朕久念卿
忠勤雖年高猶可宜力浩頓首謝有詔增建東宮涼樓殿位浩
諫曰皇太子義兼臣子若所居與至尊相侔恐制度未宜且損
儉德上嘉其言爲之罷役未幾太子生日上于宴中顧羣臣曰
卿等當效孟浩公正敢言無患朕不能用也一日上語宰臣朱
殷帝呼其叔湘東王爲豬王食之以牢納之泥中以爲戲笑書
于史策所以勸善懲惡海陵以近習掌記注當時行事實錄不
載今當求訪書之浩因奏歷古以來未聞有不明賞罰而能致
治者國家賞善罰惡雖多天下莫能知乞自今凡賞功罰罪皆
具事狀頒告天下使君子知勸以遷善小人知懼以自警詔可
俄進尚書右丞兼太子少傅罷爲真定尹賜通犀帶十三年卒

穀後累官中京留守同知終利涉軍節度使章宗卽位詔故侍郎田穀等皆中正之士小人陷以朋黨得罪當時在者俱已錄用其議推思亡者以聞又遇張汝霖張浩與松年友善擗置不問汝霖死後復詔尚書省自田穀黨事之後有官者以爲戒惟務苟且習以成風先帝知穀等無罪存者皆列顯爵獨死者尚未追復子孫尚在編戶朕甚憫焉宜推先帝所以褒錄忠直之意並加恩恤以勵風俗乃盡復生前官爵子孫皆量與恩例中安及二子資質俱登進士後終沂州防禦使家世好義祖士方正直敢言出臨潢移宛平遼道宗信讒殺其太子世無敢自其冤者士方擊義鍾以訴遼主感悟卒誅賊臣耶律乙辛遂蒙厚賞授承奉官資字文孺性孝友勤敏好學由復州軍士判官補尚書省令史擢右三部檢法司正侍御史賈鉉舉資安靜有

守不尚奔競政府亦言其廉素善議論州河北東西大名府路提刑判官遷授尚書省都事以喪去用薦者多起復刑部員外郎爲侍御史累遷南京路按察使卒資教厚尚義篤于親朋不營產業比歿家甚窶上聞憫惜之贈朝列大夫仍厚卹其家質字敬叔累官吏部主事以才幹舉遷昭義軍節度副使至禮部尚書致仕卒章宗嘗問張萬公質臨事若何對以勝其兄答言及其兄亦可矣

蔡松年字伯堅宣和末從父靖守燕山以爲管勾機宜文字及靖降宗望辟松年爲元帥府令史天會中換授太子中允俄除真定府判官遂家焉時初平鎮定西山羣盜居民千餘家悉爲賊汙力爲辨論竟得不坐以微巧得宗弼意引爲行尚書郎伐朱兼總軍中六部事與海陵同在軍雅相厚善宗弼入相薦爲

刑部員外郎轉左司素與田穀不相能穀頗議靖將兵不能守
中山終敗宋國以此薄其爲人拒之由是構怨天德初擢吏部
侍郎俄遷戶部尚書啓海陵遷中都徙權貨務復鈔引法皆其
謀也會謀伐宋囚宋故臣亟擢顯位以聳南人觀聽自崇德大
夫進銀青階爲賀宋正旦使還改吏部尚書尋拜叅知政事遷
尚書右丞未幾轉左丞封邵國公久之拜右丞相加儀同三司
改衛國公卒年五十三海陵悼惜加封吳國公謚文簡遣翰林
待制蕭籲護喪歸葬松年事繼母孝喜用恤親黨性復豪侈不
計家之有無文詞清麗尤工樂府有文集行于世 子珪字正
甫登進士除澄州軍事判官遷三河主簿父憂起復翰林修撰
同知制誥在職八年改戶部員外郎兼太常丞充編類詳定檢
討刪定官號爲辨博朝廷制度多所損益海陵廣中都城東門

外舊有兩燕王墓相傳六國時燕王與太子丹葬處及啓墳其
東墓題曰燕靈王乃西漢高祖子劉建西蓋燕康王劉嘉之葬
也。其作辨據并葬制名物款刻甚詳久之除河東北路轉運副
使入遷禮部郎中封真定縣男因得風疾改濰州刺史致仕卒
所著有補正水經五篇及晉陽志十二卷文集五十五卷

曹望之字景蕭其先臨潢人遼季移家宜德天會間年十四以
秀民子選充女直字學生業成除西京教授爲元帥府并行省
書令史補正令史錄資授修武校尉由右司都事改行臺吏部
員外郎海陵爲相嘗以書致其私望之不從天德元年調石州
同知坐事免久之除絳陽軍節度副使入爲戶部員外詔買牛
萬頭給按出虎八猛安徙居南京者令主給之撒八反轉致甲
仗八萬自洺州輸燕子城運米八十萬斛由蔡入淮償伐宋諸

軍望之如期集事進本部郎中特賜進士及第大定初討窩幹
望之又主軍食給與有節凡省糧三十萬石草五十萬束以勞
進階又得請于大鹽澤設官榷鹽聽民以米貿易贖凡二十餘
萬石以濟東北路餓饑所活不可勝數自正隆兵興農桑失業
猛安謀克屯田多不如法世宗遣分道勸農廉問職官臧否還
言乞汰諸路胥吏可減其半遷本部侍郎領覆實繕修大內財
用大省費用上召見諭勉之頃之世宗出郊見運河壅塞問其
故主者奏歲久戶部不肯經書以致如此上責望之有水運不
濟泊乃用陸運煩費民力令以宮籍監戶并東宮諸王人從充
役若不足補以五百里內軍往治坐嘆太宗實錄成皆賜銀幣
以爲賞薄世宗聞之出爲德州防禦使諭之曰汝爲人能幹心
不忠實朕前往安州春水人言汝無事君之義朕敕臣下有過

卽當諫諍汝。但面從退而謗議不忠不孝如此。今出汝于外。宜改心滌慮。不然身亦莫保。及到任有惠政。百姓爲立生祠。改西京留守同知上書論便宜事。其一論山東河北猛安謀克與百姓雜處。民多失業。陳蔡汝穎之間。土廣人稀。宜徙百姓以實其處。復數年之賦以安輯之。百姓亡命及避役軍中者。閱實其人。使還本貫。或編近縣以爲客戶。或留爲佃戶者。亦籍其姓名。州縣與猛安事干涉者。無相黨匿。庶幾軍民協和。盜賊弭息。其二論薦舉之法。虛文無實。宰相按摠及其所識。不及其所不識。內外所舉亦輒不用。或指以爲朋黨。遂不敢復舉。宜令宰相執歲舉三品二人。御史大夫以下。內外官終秩舉二人。自此以下。以品殺爲差等。終秩不舉者。遇轉官勒不遷。其三論守邊將帥。及沿邊州縣。漁剝軍民。多興力役。宜歲遣御史周行察之。邊部有訟。

無得輒遣白身人徵斷。宜于省部有出身女直契丹。及縣令丞簿中擇廉能者。因其風俗。略定科條。務爲簡易。徵斷牛馬入官籍數。如邊部遇饑饉。卽以此賑給之。軍中舊籍馬死。則一村均錢補買。往往鬻妻子。買耕牛以備之。臣恐數年之後。邊防困弊。臨時賑濟。費財十倍而無益。早爲之所。則財用省而邊備實矣。官給軍箭。用盡則市以補之。皆朽鈍不堪用。可每歲給官箭一分。以補其闕。邇民闕食。給米。地遠負重。往往就倉賤賣而去。計口支錢。則公私兩便。陝西正副。宜如猛安謀克。用土人一員。隊將亦宜參用土人。久居其任。以廉吏爲提舉。舉察總管府以下官農隙校閱。以嚴武備。則太平之時。有經制之略矣。又論鹽場。宜令戶部公議。辟舉論漕運。先計河倉。見在幾何。通州客受幾何。京師歲費幾何。宜計實數。以科稅入。書奏多見采納。以本官

行六部事于北邊召拜戶部尚書是時戶部高德基坐高估作粟責降世宗念望之各出納或懲德基也既出使人諭之曰勿以德基下粟直要在平估而已望之久習事有治錢穀名性剛愎頗沾沾自露與梁肅咸銜耀求進世宗謂所上言希冀執政其于國家竟亦何補未幾病卒年五十六賜錢三千貫勅使致祭賻銀絹重綵擢其子淵爲奉御澤爲筆視承奉望之初不學及貴稍知讀書遂刻苦自致有詩集三十卷其後尚輦局舉出身人不稱上欲更改監臨格式以問尚書劉瑋瑋恐監官謗已不肯實對世宗嘆息因思望之之敢行也以爲不如

梁肅字孟容奉聖州人自幼勤學讀書遠旦無間寒暑母葛氏嘗滅燭止之登天眷二年進士調平遙縣簿歷望都并絳縣令察廉入爲尚書省令史除定海軍節度山東西路轉運皆爲副

使改中都警巡使營治汴宮分護役事攝大名少尹正隆末境內盜起驅陷平民數千繫于獄不能自辨至卽考驗讞出者十八九。大定二年宛平趙植薦其勤恪清廉轉中都運副改大興少尹疏言方今用度不足非但邊兵耗費而已吏部以常調除漕司僚佐皆年老資高類不稱職。自今宜擇軍功及進士諸科門蔭人能知錢穀利害使國用饒足不傷民者授之。每五年委吏部通校有無水旱屯兵視其增耗而黜陟之。仍舊禁天下酒麴自京師及州郡官務不得酤販出城其縣鎮鄉村權行停止。不報。三年坐捕蝗不如期貶川州刺史。以左諫議大夫吳籲薦起除河北東路運副。時窩幹亂後沿邊不足詔肅措置移牒肇州北京廣寧鹽場許民以米易鹽兵民皆得其利。四年通檢東平大名兩路戶籍物力獨稱平允。勅視爲準。革諸路苛刻增益。

爲功者。七年父憂起復爲都水監。詔視李固河決還。奏決河水六分舊河水四分。今障塞決河復故道爲一。若再決而南則南京憂北則又慮山東河北。詔從其議。止于李固南築隄使兩河分流以殺水勢。改大理卿上以東京久不治。自擇爲留守。同知遷中都。都轉運使轉吏部尚書。疏陳臺官自大夫至監察諫官自大夫至拾遺陛下宜親擇不可委之宰相。恐樹私恩塞言路。上嘉納之。嘗舉同安主簿高旭起身儒士優于治民。今使坐列市肆。權平陽酒酤非所能也。自今諸道鹽鐵依舊文武叅注其酒稅使副以右選三差俱最者爲之。詔可。俄改刑部尚書爲宋國詳問使。責以盟書所載止加帝上皇字免奉表稱臣。稱名再拜。量減歲幣。悉同舊儀。親接國書。茲禮已定于今十年。自當依禮引見。輒令就館迫取。大非姪國禮體。宜以誠報。肅至。宋主一

一如約立接國書還附書謝稱姪宋皇帝謹再拜致書叔大金
應天興祚欽文廣武仁德聖孝皇帝闕下十年久約兩國克遵
嘗屢伸于寸誠願折衷于新貺豈料尚循躬受之儀不顧禮文
之縛因歲元之來使遂商榷以從權敢勞將命而還先布款悰
之懇自餘專使乞遂請祈肅還至泗州先遣都管趙王府長史
馳滿蒲馬入奏世宗大喜欲就擢爲執政宰相良弼以爲可相
但使宋還卽爲之恐自此輕我乃止久之爲濟南尹上疏刑罰
世輕世重今太平日久當用中典而有司猶取遼季之法徒一
年者加杖一百是一罪二刑也臣實痛之自今止令居作免其
決杖不報未幾致仕復起彰德軍節度使治入異等以廉能薦
召拜叅知政事肅奏今之親軍卽漢之羽林蓋淮故事皆通孝
經每百戶賜以一部使之習讀庶知臣子之道出職之日可通

政事詔乃併賜護衛復奏方今百姓困餓斗米錢三百何從可
得計天下歲入二千萬貫以上歲用尚餘千萬院務坊場可納
穀帛折支官兵俸給百姓合納錢者通減數百萬使錢布散民
間稍稍易得上許之又疏生財舒川八事一罷隨司通事二罷
酒稅司拘欄人三天水郡王本族已無在者餘皆遠族可罷養
濟四裁減隨司契丹吏員五罷權醋以利與民六量減鹽價使
私鹽不行民不犯法七隨路酒稅許折納諸物八今歲大稔乞
廣糴粟麥使錢貨流出詔答趙氏養濟一事乃國家美政不可
罷其七事宰相詳議以聞上時在位已久每鑒海陵之失恐政
有繆戾令悉心開奏肅論正員官按差權攝官往往苟且不事
其事乞于縣令中留十人備差無差正員官有旨自今權攝有
公罪正員雖遠而本職未替者勿以去官論之又奏四時畋獵

雖古禮聖人亦以爲戒陛下春秋高法宮燕處亦足怡神屬時嚴寒馳騁于山林之間願爲宗社自重天下之福上曰朕諸子方壯使之習武故時一往爾震武軍節度同知鄧秉鈞言外多闕官及循資擬注不得其人上問宰相皆曰行之已久仍舊爲便肅曰不然用人之法有仕及四十年無敗事卽與節度使豈必循資哉上曰必如此察其政蹟善者升之後政再察之善又升之如此方可得人亦無曠事肅曰誠如聖訓又論盜賊不息請無禁兵器上問若所在有之利害如何肅曰他路則已中都一路上農夫聽置之似平無害上曰朕將思之凡使宋所致禮物大使金二百兩銀二千兩副使半之幣帛雜物稱是及推排物力肅謂當率先庶民乃自增物力六十餘貫論者多之二十三年請老上許之仍語宰臣梁肅知無不言正人也詔以其子

汝翼爲閹門祇候二十八年卒諡正憲

移刺道本名趙三其先乙室部人徙咸平爲人寬厚有大志以篤孝著名通女直契丹漢字皇統初累補刑部并尚書省令使再遷大理司直母憂起復戶部員外郎正隆三年徙臨潢咸平路畢沙河等三猛安屯戍幹盧速還奏海陵見其骨相異常許以他日必登公輔明年遷戶部郎中海陵伐宋爲都督府長史淮南師還無復紀律百姓苦士卒俘掠有男女二百餘自願爲奴道受之至淮俟諸軍畢濟乃悉遣還大定二年與梁錫安撫山東招諭盜賊並令避盜避役者歸業罪名無輕重皆原之還參僕散忠義幕府事討平窩幹給以俘獲生口悉縱遣之還京入見旣退世宗目送之言其有才可膺大用俄遷翰林直學士兼修起居注頃之又言其清廉幹濟處以近職不足以顯中都

轉連繁劇。改爲同知兼廉察河北山東等路官吏善惡升降黜陟之。是歲以廉升者磁州刺史完顏蒲速烈爲北京副留守。濰州蒲察蒲查爲博州防禦使。威州完顏兀答補改刺磁州治狀不善衛州防禦完顏阿鄰改陳州真定尹。徒單枚改降興平軍節度使。安國軍店括重國改彰化軍。仍具功過宜論衆人。毋受饋獻。還遷大理卿。會宋人請和。罷兵遣往山東閱實軍器振贍戍兵妻子。再除大興同知。會盜取內左藏庫金珠殺都監郭良臣。點檢司執疑似者八人。笞三人死五人者。自誣上疑其無賊。命道參問。久持其獄。旣而親軍百人長完顏阿思鉢鬻金事覺。伏誅。上曰。雖楚之下。何求不得。奈何不以情求命。周掠死者家各錢二百貫。不死者人五十貫。自今百人長五士人長非直日不得帶刀入宮。尋遷戶部尚書。改西北路招討使。賜金帶故事。

招討使到官諸部皆獻馳馬多至數百道皆邾之初諸部有獄訟例遣胥吏按問往往爲姦利道請專設一官上嘉納之招討司設勘事官自此始父喪起復拜叅知政事上問律法決死囚不過七日徒刑五日杖刑三日比來大理寺斷獄輒經旬月此官吏之責命嚴戒約以祛其弊進尚書右丞以年踰六十乞致仕詔諭心力未衰不許除爲南京留守賜通犀帶上以河南統軍烏古論思列資性少愼諭以凡遇過事須與道共議未幾入拜平章政事時縣令多闕道奏散官宣武以上借除以充之上曰廉察所進錄事丞簿凡有清幹之譽并縣尉入優等者皆與縣令散官至五品無貪汙曠職之名者亦可與之俟縣令不闕卽如舊制二十三年上以咸平故鄉地涼事少老者所宜且高幹亂後民業尚未獲舊乃罷爲咸平尹封莘國公聽歸鄉里以

安輯之明年薨。道孝于家。忠于君。兼習法令。通政事。上聞悼惜。適幸上京道。過遣使致祭。賻贈有加。詔圖像藏秘省。子光祖。字仲禮。幼名入狗。以廕補閤門祗候。調平晉令。衛州都巡。河內。承奉押班。累轉東上閤門使。兼典客署令。大安中。改少府少監。母憂起復。歷儀鸞局使。宣徽院同知。秘書監。右宣徽使。興定二年。議建公府。以爲長久之利。語在九公傳。三年。轉左宣徽使。五年卒。

蘇保衡字宗尹。雲中天成人。父京。遼進士。爲西京留守。宗翰兵至京。出降久之。病篤。托以保衡京死。宗翰薦之于朝。賜進士出身。補太子洗馬。調解州軍事判官。辟撤離。陝西幕府。參議軍。事累官。典中同知。天德間。繕治中都。張浩舉以分督工役。改大興少尹。又督諸陵工。遷工部尚書。會伐宋。與徐文等督造戰艦。

于通州兵興以爲制東道水軍都統制率舟師泛海徑趨臨安
宋兵來襲敗于海中大定二年召赴中都時山東盜賊嘯聚契
丹攻掠臨潢等州郡百姓困弊詔保衡安撫山東前太子少保
高思廉安撫臨潢發倉粟給布帛無妻室者具名以聞還改刑
部尚書與工部尚書宗永兵部侍郎完顏余里也往河南山東
陝西宣問屯田軍人有曾破大敵及攻城野戰立功者具名以
聞或以寡敵衆或與敵相當能先登敗敵者正軍及阿里喜補
官一階猛安謀克上功狀尚書省會隨軍至淮上破敵者亦准
遷賞僕散忠義伐宋命行戶部于關中兼糾察許以便宜黜守
令不法者十餘人邪守傳慎微忤用事者被讒構下獄力救得
免入爲太常卿遷禮部尚書拜叅知政事宋人請和詔往南京
與忠義斟酌事宜行之入奏進尚書右丞詔監護昔年延燒諸

殿役事遣少府監張仲愈取南京宮殿圖本上聞之恐民間將謂朕效正隆華侈亟遣仲愈還六年冬有疾求致仕不許七年二月庚寅薨年五十五輟朝賻贈命有司致祭

翟永固字仲堅中都良鄉人金與宋約攻遼以燕歸宋宋擢永固經義兼策進士第一授開德府儀曹叅軍金破宋永固北歸又中天會六年詞賦科授懷安丞遷望雲令補樞密院令史宗翰愛其能辟爲府掾家貧求外不許周之以錢薦攝左司郎中除定武軍節度副使歷清州防禦同知入爲工部員外郎母憂起復禮部郎中遷翰林直學士海陵篡立命副完顏思恭爲宋報諭使告以廢立事就令伺察動靜還改禮部侍郎久之分護燕京宮室役事俄遷太常卿考試貞元元年進士出尊祖配天賦題海陵以爲猜度已意召問賦題不稱朕意我祖在位時祭

天拜乎對曰拜然則豈有生而致拜死乃同體配食者對以古
有之載在典禮海陵曰若桀紂曾行亦欲我行之乎遂與張景
仁皆杖二十而進士張汝霖賦第八韻有曰方今將行郊祀海
陵詰之曰汝安知乎亦杖之三十俄遷永固禮部尚書賜笏頭
毬文金帶改永定軍節度使加光祿大夫以寵異之復轉翰林
學士承旨與直學士韓汝嘉俱召至內殿問以伐宋事對曰宋
人事本朝無幾隙伐之無名縱使可伐亦無煩親征遣將帥可
也。因大忤旨卽請致仕歸臥于家大定二年起爲尚書左丞請
依舊制廉察官吏章正隆守令之汙從之明年罷爲真定尹賜
通犀帶五年懇許致仕六年卒

張景仁字壽甫遼西人累官翰林待制大定二年命掌僕散忠
義伐宋文辭宋人議和改奉表爲國書臣爲姪往復凡七書然

後定其書。皆景仁爲之。世宗稱其指事達意。辨而裁制。真能文士也。五年。擢兵入爲翰林直學士。七年。遷侍講。八年。爲詳讀官。奏宋國書中有寶鄰字。太涉平易。上命一一校勘。累年。國書有鄰字否。其六年書中亦有之上。責問詳讀官。禮部侍郎劉仲淵降石州刺史詔。有司就諭宋使臣王淪。歸告其主。後日國書不得復爾。遷景仁翰林學士。同修國史。久之。名積陳言文字。內中事款凡二十餘。如某事可行。餘皆無謂。明日復召責以卿昨言可行者。朕觀之中。復有不可行者。卿言無謂中。反有可行者。朕未嘗使卿分別可否。卿何得輒專之。自今當以爲戒。十年。兼太常卿。轉承旨。兼修國史。改河南尹。二十一年。召爲御史大夫。朝臣言景仁有文藝。而頗率易。醉中輒脫失言。少周密。不可任臺察。世宗語以卿博學老儒。求如古中執法。然後行之。斯爲稱矣。

不能如古之人朝臣不獨請卿亦謂朕不能知人頃之被詔就臺中治監察罪輒以便服視決罰上聞而責之戒以當自慎免及黜罰頓首以謝未幾提控元妃李氏罪事劾奏駢馬烏古論元忠怙寵自任倨慢朝士不奏輒杖都木監丞高杲壽治道路不如式無人臣禮上爲當使左宣徽蒲察鼎壽傳詔戒勅監丞六品有罪問奏今乃一切擅決御史在尊朝廷汝當自咎勿再犯朝廷肅然拜禮部尚書與少府監張儼言董治大金受命萬世之寶厚一寸四分蟠龍紐高厚各四寸六分有半是歲卒

張用直臨潢人少以學行稱遼王宗幹間之延置門下海陵兄弟皆從之學天眷二年以教宗子賜進士及第除禮部郎中皇統四年爲宣徽判官歷橫海軍節度副使改寧州刺史海陵卽位召爲簽書徵政院事轉太常卿擢太子詹事諭以朕雖不能

博通經史。亦粗有所聞。皆卿平昔輔導之力。太子方就學。宜善道之。朕父子並受卿學。亦儒者之榮也。久之爲賀宋國正旦使。卒于汴上。深悼惜。遣使迎護其喪。官給路費。喪至。臨奠。賜錢千萬。其養子始七歲。特受武義將軍。

魏子平字仲均。弘州人。登進士調五臺主簿。累除尚書省令史。大理丞。左司都事。中都轉運同知。太府監。正隆三年爲賀宋生日。副使還。口海陵方謀伐宋。問蘇州與大名孰優。對曰。江湖地卑濕。夏服蕉葛。紬不堪暑。安得與大名比。海陵不悅。世宗卽位。除戶部侍郎。從僕散忠義掌河南餽運。給金牌一。銀牌六。糧道給辦。進戶部尚書。大定六年復爲賀宋生日。使故事無再往者。上用此以優其勞。還拜叅知政事。上問古者稅民什一而民足。今百一而民不足。何也。對曰。什一取其公田之人。今無公田而

稅其私田爲法不同古有一易再易之田今一切與上田均稅之此民所以困也又問戍卒逃亡物故欲按物力高者補之對曰富家子弟驍懦川以守戍歲時求索無厭家產隨壞不若按物力多寡賦之以募材勇騎射之士庶幾官收實川上從之海州捕賊八十餘其賊首之兄任朱軍官上語宰相和好恐不能久今宿泗間漢軍宜易以女直軍對口誓書稱沿邊州城除自來合設置射樹軍數并巡尉外更不得屯軍守戍上謂此更代非增戍也未幾又問前日令內任官六品以上外任五品以上並舉所知何未聞有舉者豈真無才抑知而不舉乎子平請令富舉之官每任須舉一人惟視其當不以爲賞罰宋制凡薦舉人犯私罪舉主雖至宰執亦坐降罰人心有恒者鮮財利怵于而或變其所守宰臣任大責重豈坐是以爲升黜耶無何刺史

澤州劉德裕祈州斜哥同知滄州詭里也易州詭里刺楚丘令
劉春哥以賊汙抵罪上欲詔示中外丞相守道言不可以問子
平對曰臣聞懲一戒百陛下固宜行之上遂降詔焉南京統軍
奏宋人于襄陽漢江上造舟爲三浮梁調兵移屯募民運糧復
置所罷制置同請備之上令宰臣度其事勢子平曰臣聞襄陽
薪芻皆于江北取給殆爲此也上曰朕與卿等及今治其未然
若俟有事然後治之則亦晚矣使修起居注粘剌幹特刺詰問
皆如子平策還奏詔凡妄說邊關兵事者徒二年告人得實賞
錢五百貫時議牛盡力稼穡有功于人欲罷爲牲子平奏惟天
地宗廟宜用所以異大祀之禮從之十一年罷爲南京留守未
幾致仕十五年起爲平陽尹復致仕二十六年薨于家

蒲察通本名蒲魯渾中都路胡土愛割蠻猛安人精騎射性溫

厚有識慮熙宗選充護衛以父老懇乞就養衆咸許曰得此終身榮貴何乃懇辭後以門閭加昭信校尉授頓舍改御院通進海陵伐宋命總隆州諸軍尤號精銳兵既歷淮令率三百騎先濟覘敵及奔中敵衆躍出通按兵直前傍有舞槊來刺者回身射之應弦而斃諸軍併擊敗之海陵召見喜形于色曰兵事定汝勿憂爵賞至揚州營于別屯是夜有人來告上已被弑通欲執而殺之續聞其實哀問什地衆掖而起徑入營門哭之軍還入見世宗幼嘗與遊素知其人卽授尚厯局副使諭宰臣常令見朕欲問以事而考其言將大用之窩幹反命佩金符詣軍前督戰賊破以功授世襲謀克吳人亂承詔繼往泣軍還本局使母喪起復殿前右衛將軍兼領閑廐使尋命其子蒲速烈尚衛國公主出爲肇州防禦使賜以金帶因戒敕之語在帝紀尋擢

蒲與路節度使移鎮歸德軍遷西南路招討入知大興府事除
殿前都點檢上許其機識崇尹不及大定十七年拜尚書右丞
轉左丞詔議推排大臣皆謂止驗見在產業通言必須通括各
猛安謀克人戶物力多寡則貧富自分貧富分則版籍定如有
緩急驗籍科差富者不得隱貧者不重困與一例科差者大不
侔矣上是通言謂宰臣曰議事當如通之盡心也閱三歲進平
章政事封任國公世宗將幸上京以通朝廷舊人命爲上京留
守先往鎮撫上復欲相之因惜其老除知真定府事仍賜錢千
貫未幾改知平陽府移鳳翔致仕明昌四年復起知廣寧府累
表請老加開府儀同三司致仕永安三年卒特命勅祭及葬論
以故事所無通爲人通敏有材幹多知人鑒所薦舉完顏守貞
內族裔後皆爲名臣

李木魯阿魯罕隆州惡離葛山人年八歲選習契丹并女直字
旣壯爲黃龍府路萬戶令史貞元二年試外路胥吏三百名阿
魯罕在第一補宗正府令史轉尚書省僕散忠義討窩幹辟掌
邊關文字甚見信任賊平命招集散亡復業者數萬人復從伐
宋屢入奏事論列可否多從所言命宰相行之及請和又使往
議已定入奏賜銀百兩重綵十端忠義薦其有才幹可任詔以
爲大理司直未幾轉尚書省都事出爲順天軍節度同知紇石
烈志寧北巡以攝左右司郎中還朝除刑部員外郎再遷侍御
史紇石烈良弼又薦其持心忠正言不阿順數日遷勸農副使
同修國史改右司郎中請徙城中河南戍軍屯營于十里外俄
拜吏部侍郎除山東統軍都監徙置河南八猛安遷武勝軍節
度使入爲吏部尚書改西南路招討使奏有司督本路猛安人

戶所貸官粟。乞俟豐年從之。禁軍有以甲葉易諸物。或挾兵鐵。與天德樵場互市。及界外歲采銅礦。皆一切禁絕。之上番軍。不許用親戚奴婢。及傭顧者。營壘損圯。以時葺治。不與所部猛安謀克會宴。遠近稱治。兵民皆畏愛之。與上京留守完顏烏里也。皆起身胥吏。而爲人沉厚。賢尤過之。俄改陝西路統軍使兼京兆尹。政績尤著。遇軍籍有闕。舊例用子弟補充。材多不堪。乃于阿里喜旗鼓手內。選補軍人。以春牧馬。往往經夏不收。瘠弱多死。阿魯罕命以時收秣。自是死損者少。仍春秋督閱騎射。以嚴武備。終南采漆者。節其期限。檢其出入。以防姦細。召爲叅知政事。命條上天德陝西行事。上稱善。惜其已耄。語宰相曰。用人之道。當自其壯年。心力精強時用之。阿魯罕使其早用。朝廷必得輔助之力。如此可用之材。但拘資格。以致遲晚。深爲可嘆。未幾

以疾乞致仕除北京留守卒

弘簡錄卷二百三十六

明刑部員外郎仁和弘齋邵經邦學

皇清翰林院侍講學士四世孫遠平校閱

載記 金侍從二

粘割幹特刺

夾谷衡

尼鹿古鑑

張九思

高衍

楊邦基

王脩

程輝王蔚劉樞

馬惠迪

劉璋

兄琬

馬琪

楊伯通國公真

賈絃

孫鐸

與屯忠孝

蒲察思忠

完顏寓

張翰

任天寵

獨吉思忠

納坦謀嘉

把胡魯

師安石

李復亨

赤蓋合喜

烏古論鎬

粘割幹特刺蓋州別里賣猛安吳屈謀克人貞元初以習女直

字試補戶部令史轉尚書省大定七年選授吏部主事歷右補

闕修起居注左司員外郎九年河南統軍宗敘言宋人大啓兵

欽欲求入見世宗遣往就問至汴召凡言邊事者詰之皆無狀
還報世宗喜曰朕固知其妄也詔凡妄言邊關兵馬者徒二年
十年誅者又言夏國發兵築祁安城及襲殺喬家族首領結什
角與宋人通謀犯邊詔同大理卿李昌圖往按其事察知無交
通狀結什角以兵犯夏境故殺之祁安城本國所賜發兵修築
以備他盜今但於熙秦逼近宋夏衝要量添戍兵及問喬家等
族民戶願以結什角姪趙師古爲首領詔從之授以宣武將軍
木波喬家等四族都鈐轄還日轉右將軍賜衣馬車牛弓矢鎧
仗十二年爲夏國生日使還授右司郎中遷右副都點檢久之
出爲河南路統軍都監賜金帶及具裝馬十七年授昌武軍節
度使兼領前職明年入爲刑部尚書拜叅知政事世宗嘗諭唐
括安禮曰朕思爲治之道考擇人材最爲難事其餘常務各有

柱式非此可比如幹特刺所舉者頗稱朕意時右三部檢法蒙括蠻都告幹特刺與招討哲典朋黨乞付刑部詰問上謂哲典免死則可目以朋黨今已伏誅乃誣謗耳因語宰臣朕素知此人極有識慮貌雖柔而心甚剛直所行不率易也二十二年委提控代州阜通監召見諭曰朕自任卿以來悉卿材幹故擢爲執政卿亦體朕待遇之意能勉盡所職凡謀議奏對多副朕心莫倚上有宰相而自嫌外蓋舊人年老新人未苦經練是以委責於卿但有所見悉心以言勿特嫌以爲不知也明年進尚書右丞世宗以猛安謀克拋留土田貴宰臣此事皆卿輩所當陳舉以爲細務必俟朕言而後行朕嘗思之獄訟簿書有幹特刺在餘事卿輩略不介意朕亦安能置而不問耶俄坐事削一階令視事如故二十六年轉左丞世宗語曰以卿昨不在朕與宰

臣議阿魯罕年老幹魯也多病吾欲用宗浩何如幹特刺奏曰
誠如聖諭宗浩幹能可任遂用之又謂朕於天下事無不用心
一如草創時對曰自古人君始勤終怠者多有始有卒惟聖人
能之上曰唐太宗至明之主魏徵諫以十事謂其不能有終是
則有終始者實爲難矣二十八年爲上京留守賜通犀帶及射
住馬明昌二年致仕永安初有卒北方欲得舊臣任之知其精
神尚健起爲東京留守遣御史完顏剛諭旨明年復以上京祖
先基業之地仍爲留守馳驛之任到彼便宜行事是歲邊事稍
息九月卽召還朝拜平章政事封芮國公數月幹特刺卒年六
十九計聞上傷悼遣官致祭賻贈銀絹重綵錢二千貫諡曰成
肅幹特刺性溫厚醞藉上嘗稱其才真可用薦者紇石烈良弼
可謂善知人矣前後居政地十餘年甚見寵遇惟奏定五品官

子與外路司吏同試部令史及令隨朝吏員得試國史院書寫世宗非之

夾谷衡本名阿里不山東西路三土猛安益打把謀克入與尼龐古鑑俱登大定十三年女直進士補東平府教授調范陽簿選充國史編修應奉翰林文字世宗嘗語宰臣女直進士中才傑之士蓋亦難得如衡與鑑及徒單鑑皆有川材也俄遷修起居注章宗立除侍御史轉右司員外郎敷奏稱旨升左司郎中明昌二年擢御史中丞未幾拜叅知政事以病表乞致仕詔撫慰不許四年上諭朕選大臣俾參機務必資謀畫協贊治平其或得失晦而未形利害膠而未決正須識見純直方能去取合公比來議事之臣鮮有一定之論蓋以內無所守故臨事而惑致其中有失朕將何賴卿忠實公方審其是者執而不回見其

非者去而能果有若權衡應物可賜名衡古者命名將以責實
汝先有實可稱行之克終乃副朕意遇同列胥持國言區種法
衡奏曰若苟有利古已行之但用功多而所種少荒廢田土徒
勞無益俄進尚書右丞故事隨朝久任得使江南衡未使就拜
特賜錢六千貫六年遷左丞從討阻鞮出撫州行樞密院副使
選親軍武衛軍各五百以從仍給錢五千萬父憂起復本職承
安二年轉上京留守尋復行院規畫邊事以修完封界賜詔褒
諭四年就拜平章政事封英國公五月庚申薨年五十一上聞
惻然爲輟朝命官致祭賻贈有加遣使勅葬諡曰貞獻 尼龐
古鑑本名外留隆州人識女直小字及漢字闡隆安教授改卽
墨主簿名授國子助教擢近侍局直長世宗器其材稱爲正直
幹治俄改太子侍丞踰年遷應奉翰林文字兼右三部司正章

宗爲皇太孫令保護之禮節言動帝謂猶有國俗純厚舊風存對宰臣言其純直通敏朕甚嘉之章宗立累遷戶部侍郎兼翰林直學士俄轉大興府同知用大臣薦改知大興府事明昌五年拜叅知政事承安元年卒諡曰文肅

張九思字全行錦州人皇統初補行臺省女直譯史除易州同知三遷亳州防禦使歸德尹副劉仲延受宋國歲貢於泗州前此每以幣物不精責宋使者必私饋銀幣以爲常例九思獨不肯受仲延隨之從此遂絕自大理評事再遷少卿嘗議清池令雙中天眷初父虔知永安軍遇叛寇孟邦傑執府虔奮不顧身守節而終其子止合雜班蔭敍乞改正班以勸忠孝世宗從之尋轉工部郎中大興少尹中都都轉運同知工刑二部侍郎素守清約然急於進取一切以功利爲務奉詔檢括官田率意在

情不恤百姓凡地名疑似如皇后店太子莊燕樂城之類不問
民田契驗一切籍之復有鄰接官地冒占幸免者世宗聞知其
弊召還戒之曰如遼時支撥地土及國初元帥府拘刷民間指
射租田近歲冒爲已業此類當拘籍之朕豈欲一槩奪民餘田
使百姓失業也俄拜御史中丞九思建言屯田猛安人家貧爲
盜徵償其賊輒賣所種屯地自今止令事主招佃收其租入估
買相當卽還其地詔與臨洮尹完顏讓議同從之旣而遷工部
尚書年雖高頗執強自用坐其子尚書省令史若拙冒填詔勅
事覺亡命乃免其官聞命惶懼因感疾卒

高衍字穆仲遼陽渤海人自少敏而好學有能賦聲同舍生欲
試其才使一日賦十題執筆怡然未暮皆就彬然可觀登進士
調瀋陰丞召爲尚書省令史除右司都事母喪起復吏部員外

郎攝左司吏部初擬王彥潛常大榮皆進士第一除彥潛洺州防禦判官大榮臨海軍節度判官次當李慶之濟州觀察判官左司郎中賈昌祚挾私欲與慶之洺州詭曰洺雖佳郡防禦幕官在節鎮下乃改擬彥潛臨海軍大榮濟州慶之弟慶雲爲尚書省令史多與樞貴遊有大奉國臣者永寧太后族人與衍鄉里有舊先爲東京警巡院使以賊免及是擬爲貴德縣令海陵大怒遂與昌祚慶雲并吏部侍郎馮仲等三人各決杖而死餘皆降衍爲清水縣簿攝吏部楊邦基宜春縣簿主事宋全部陰縣簿尚書省知除楊伯傑閬陽縣簿大定初入爲大理司直遷戶部員外郎中都都轉運同知太常少卿吏部左司郎中世宗使衍傳詔臺省百司朕初卽位庶政多有未諳實賴將相大臣同心輔佐或有所補朕意孜孜而羣臣承顏順旨無

所匡正卿等其體朕意俄遷吏部尚書凡三任悉知舊弊每季
選人至託以檢閱舊籍滯留不去悉行禁革歲餘銓事修理選
人便之五年爲賀宋國生日使中道得疾去職七年卒楊邦
基字德懋華陰人父紉宋末爲易州佐以不從蔡靖降被害時
邦基年十餘匿僧舍得免既長好學能文登天眷二年進士調
灤州軍事判官遷太原交城令以不從府尹徒單恭斂金錡佛
廉察使秉德知之尹與九縣令皆免去獨推河東第一名爲禮
部主事轉兵部員外郎攝吏部差除以事貶官太師張浩言其
人材可用由高密令竟除刑部郎中俄改太府秘書二少監知
登聞檢院遷翰林直學士秘書監兼左諫議大夫修起居注與
中都警巡使張子衍姻家子衍道遇皇太子衛仗不避被劾邦
基見臺官求解因坐削官出爲西京留守同知徙山東東路轉

運使永定軍節度使致仕卒生平善畫山水人物以名當世

王脩字脩然涿州人與程輝王蔚俱登皇統二年進士同除尚書省令史脩改蘄州同知遷刑部員外郎坐請鵬故人姦罪決杖降泰定軍節度副使四遷大興府治中戶部侍郎世宗語宰臣脩前爲外官有剛直名今聞多務山罪非理從輕又巧倖偷安若果剛直則當忘身爲國履正無偏何必賣法以徼禍耶大定中命賑濟密雲等三十六縣猛安人戶坐冒請粟奏奪一貽出爲北京留守同知上曰人多言脩能官以朕觀之凡事不肯盡力直一老姦耳二十四年遷遼東路轉運使歲餘改顯德軍節度使復坐搜辱倉使王祺致死追兩官降授鄆州防禦使章宗卽位擢大典府同知審錄官奏脩前任廉潔軍吏斂迹訟獄無滯遷禮部尚書兼大理卿使宋還會改葬章宗母孝懿后父

徒單貞帝欲用唐葬李靖故事班劬鼓吹羽葆等儀衛宰臣以貞與弒熙宗意頗難之有詔下禮官議脩言晉葬丞相王導給前後羽葆鼓吹武賁班劬百人唐以來大駕鹵簿有班劬其王公以下鹵簿並無班劬兼羽葆非臣下所宜用國朝葬大臣亦無之上怒曰典故所無固可從宜用之母但附合尚書省明昌二年知大興府闕員詔宰臣可選極有風力如脩葺者卽以命之時惡僧徒多游貴戚之門嚴禁午後不得出寺有一僧犯禁皇姑大長公主爲請立杖而死京師肅然兼以臨事果決吏民憚其威雖豪右不敢犯復坐故出人罪削官解職明年起授定海軍節度使諭旨卿賦性太剛率意行事自陷刑辟朕念入仕久頗有執持復遇歲歉民饑爲盜須川舊人鎮撫庶得安治勉盡乃心以圖後效未幾表乞致仕泰和七年卒年七十五程

輝字日新蔚州靈仙人升左司都事久之爲南京路轉運使以
宮殿火降磁州刺史有吳僧者殺州人張善友而取其妻捕得
殺之改陝西東路轉運使再遷戶部尚書大定二十三年拜叅
知政事世宗諭以朝廷事有當言毋或隱默輝亦自懼年老耳
聵恐聽聞不審或失奏對遇有所聞無不盡心啓奏帝語宰相
人謂輝言語荒唐今遇事側儻敢言過於王蔚卿等以爲何如
皆對曰輝議政可否略無隱情舊廟祭用牛帝晚年欲易以牲
輝奏古禮殆不可廢遂止帝幸上京憫地遠天寒使人勞苦來
歲正旦外國朝賀欲仰南京受書輝奏不可萬里卿命必面見
天子今半途受書臣恐異時託事效之何以爲辭議乃權免一
年又怒御史不糾舉有司市麪不時酬直詔杖責之輝言耳目
之官所犯罪輕不贖而杖似爲太過其盡言類此越三年致仕

次年復起知河南府固辭召入香閣諭以河南地勝事簡卿年雖老精力尚強可優游願養謝曰臣猶老馬芻豆待養豈可責以筋力河南境內上下千餘里河防之責尤重此臣所以憂不在也乃特詔不預河事明昌初給叅政半俸致仕承安元年卒年八十二謚曰忠簡輝生平喜雜學尤好論醫從河間劉守真說率用涼藥嘗書醫非細事神童嘗添壽見之因塗細字改書相字頗以爲慙王蔚字叔文香河人性通敏曉析吏事調良鄉丞治績優等補令史知管差除尋授都事以喪去起復行省左司員外遷郎中世宗卽位御史劾奏蔚與工部侍郎劉樞右司員外王全在正隆時皆以巧進敗法蠹政人多怨疾出爲河東北路轉運使上知三人素能幹濟猶欲用之戒以悛心改過旣正奉公無蹈前轍必獲大用旣而廉察第一改中都路都轉

廵使入爲吏部尚書以斷護衛出職事不當奪官一階復山知
河中府事遷南京留守十五年拜叅知政事明年復山知其定
并河中府明昌元年名拜尚書右丞致仕卒 劉樞字居中通
州三河人少以良家子從軍屯河間同輩皆騎射獨刻意經史
天眷二年登第調唐山縣簿轉飛狐令屬邑咸苦蔚州刺史恃
功貪汙無所顧忌樞遭其怒撫以他事繫獄將致之死會廉察
使至得直抵刺史并作以下罪錄其治狀獨入優等踰遷奉直
大夫張浩營建燕京宮室選樞分治工役遷刑部員外郎鞠治
太原尹徒單阿里虎出反狀旬日獄具轉工部郎中進侍郎出
爲南京路轉運使遷山東路都轉運使卒于官

馬惠勉字吉甫涿陰人天德三年擢第再調昌邑令察廉第一
補尚書省令史大定中出爲西京留守判官以治最振崇義軍

節度同知累遷左司郎中嘗因奏事世宗愛其明敏且資性朴實退語宰臣人之聰明多失於浮銜若惠迪者甚可喜也朕嘗與論事五品以下朝官少有如之者未幾超授御史中丞不久拜叅知政事時烏底改叛亡詔遣寧昌軍節度使崇肅行軍都統忠道往討之復請益兵有詔增加甲士兼焚毀其船楫惠迪奏以得其人不可用有其地不可居恐不足勞聖慮上曰朕固知之所以毀其船楫正欲不使再窺邊境耳無何討者不克敵而還各杖罷之惠迪尋以憂去起爲昭義軍節度使明昌元年爲南京留守致仕卒

劉瑋字德玉咸平人唐盧龍節度使仁敬之裔祖弘遼季鎮懿州金師至以州降太祖俾知咸州後終平章政事致仕父君詔同知宣徽院事瑋幼警悟業進士舉熙宗錄其舊特賜及第調

安次丞遵化縣令補尚書省令史至都事歷戶部主事監察御史世宗卽位遷戶部員外郎時將東巡命同工部郎中宋中往營行宮就陞郎中改宣徽院同知副宋國信使瑋父兄皆以是官爲使當時榮之將幸上京以行在所須特授戶部侍郎明年擢尚書時河決衛州直抵清滄皆被其害詔兼工部尚書往塞之至乃齋戒禱于河神功役齊舉復其故道召還增秩仍副宋弔祭使世宗不豫拜叅知政事俄領山陵使請外出知濟南府移鎮河中明昌二年復徙大明仍預河防事三年拜尚書右丞章宗欲別立考課法對以漢唐至今要在總核名實今提刑司體察廉能賊濫以行賞罰亦其意也若別議設法恐涉太繁有司難於承用遂止明年六月卒上將繫毬於臨武殿聞之而罷諡曰安敏瑋爲人極有心力臨事閒暇世宗稱其才幹不可易

得第用心不正。在朝多欲收恩。避怨事。有知而不言者。章宗亦曰。若實愚人。則不足論。今但使人人皆稱已。而不肯盡心。故公論少之。一兄琬字伯玉。幼名太平。以功臣子補閤門祗候。海陵改充護衛。坐與宗室往來。斥居鄉里。開世宗卽位。晝夜兼馳上謁。悅其誠。欵卽以爲十人長使。招宗敘白彥敬并志寧等皆相繼來附。還報有功。改御院通進。與烏居仁等往南京。發遣六宮百司琬建議。留右丞紇石烈良弼。經略淮右。餘皆北歸。詔從之。母憂起復。署武庫令。車駕幸西京。留爲中都總管判官。轉近侍局使。太子少詹事兼引進使。賜襲衣。未幾爲陝西統軍都監。賜旂馬金帶。皇太子贈馬與幣。名爲宣徽同知。遷詹事。擢右宣徽使。典領昭德皇后園陵襄事。太子贈以旂馬。轉左宣徽使。以疾求外除。定海軍節度使朝辭上。諭以東萊風物亦佳。卿到必得。

調養仍賜脫馬金帶綵絹俄卒于官年五十七柩過京勅有司致祭賻銀綵

馬琪字德玉大興寶坻人正隆五年擢第調清源主簿三遷永清令畿縣頗劇號爲難治前令要介有能辭琪繼任不減譽問補尚書省令史俄授定武軍節度同知興中府治中召爲戶部員外郎世宗悅其正直兼明法律改爲侍御史因奏高德溫獄於富戶寄錢事皆略不奏上以爲寬縱語宰相曰稱職之才何其難也尋轉左司員外郎扈從東巡遷右司郎中特選爲宋國信使還授吏部侍郎嘗薦楊伯通廉幹尚書省復察如其所舉尋改戶部章宗卽位除中都路都轉運使在任不肯欺官亦不害民宰臣奏戶部闕官上命選可任者舉大興府同知烏古孫仲和上言其人雖有智力恐不能主錢穀旋乃舉琪上然之擢

爲戶部尚書久之疾病在告上遣近侍傳旨不具服而出有司
當以違慢追官解任大理少卿閻公貞謂荒遽失措出於無心
復令任職明昌四年拜參知政事詔諭戶部違難得人顧無其
代故用卿晚耳旣在省久上問比來凡事何故少於往時對曰
昔宰職多有異同近來情見不同者少故覺希耳上問往多情
見爲是耶今無者爲是耶琪曰事狀明者不假情見便用情見
亦要歸之是而已五年河決陽武灌封丘而東命行尚書省事
許以便宜往治之訖役而還遷中大夫承安元年因旱乞歸不
許明年出爲安武軍節度使致仕卒琪性明敏習吏事其治錢
穀尤長然性吝好利雖位叅政私鬻省醢頗爲當時所少子師
周閤門祗候 楊伯通字吉甫弘州人大定三年登第累轉尚
書省令史至吏部主事順義軍節度副使以憂去薦爲尚書省

都事尋授定武軍節度同知明昌元年擢左司員外郎轉郎中
歷吏戶二部尚書承安二年拜叅知政事御史路鐸論其引用
鄉人李浩以公器結私恩左司郎中賈益知除武郁承望風旨
不復詳檢事涉妄冒御史大夫張暉不行糾舉上命大興府同
知賈鉉詰之所言多無形迹反責言官令再體察伯通治事如
故四年進尚書左丞致仕卒 閻公貞字正之宛平人登大定
七年進士調朝邑縣簿由普潤令補尚書省令史察廉升亳州
防禦同知改中都左警巡使以政績聞遷武定軍節度同知明
昌初召爲大理正累進大理卿公貞居法寺幾十年詳慎周密
未嘗有過舉被命校定律令多所是正金人以爲法家之祖承
安元年命與登聞檢院賈益同看讀陳言文字遷翰林侍讀學
士未幾卒

賈鉉字鼎臣博州博平人性純厚好學與孫鐸俱登大定十三年進士調滕州軍事判官單州司候補尚書省令史章宗爲相悅其材敏深器重之除陝西東路運副入爲刑部主事遷監察御史至侍御史改右司諫上疏論邊戍利害嘉納其言轉左諫議大夫刊修遼史兼工部侍郎鉉上言間者陰陽愆戾和氣不通由親民之官喜任情立威所用決杖分徑長短不如法式甚者置刃杖端因而致死願下州郡申明舊章按察官檢察不如法者具以名聞內庭勅斷亦依已定程式復論山東採茶隨山皆有一切邏護已奪民利因而執誣小民嚇取貨賂宜嚴禁止詔皆從之承安四年遷禮部尚書命佩金符行省山東等路括地有詔凡奉勅商量照勘公事皆期日聞奏鉉言如此恐官吏迫於限期姑務苟簡反害事體况簿書自有常程御史臺治其

稽緩如事有應密三月未絕者令具次第以聞下尚書省議如
省部可卽定奪者須三月擬奏如取會案牘卒難補勘者先具
次第奏知更限一月結絕違者准稽緩制書罪之泰和二年興
陵崇妃薨上問欲成服苑中行登門送喪之禮對以古無是禮
惟故宋嘗行遂已改刑部尚書三年拜叅知政事有司捕治毫
州醫者孫士明用黃紙大書勅賜神針先生年月間朱棣背龍
二字摹作寶樣以誑惑市人法寺准偽造御寶論死獄案已成
鉉奏天子有八寶其文各異今用筆描成青龍二字非八寶文
不當同偽造論上嘉其執奏遂以赦原仍諭羣臣咸當效之六
年御試以日合天統爲賦題鉉謂題雖佳恐非所以牢籠天下
士也上曰丞相崇浩嘗言試題頗易進士例不讀書朕今以難
題窘之欲令自今積致學業遂不敢言久之坐與審官院掌書

大中漏言除授事出爲安武軍節度使致仕復起知濟南府貞祐元年卒 孫鐸字振之先世滕州徙歷亭爲人性敏好學王遵古一見器之期以公輔初調海州軍事判官轉衛縣丞尚書省令史章宗爲相嘗言治官事如孫鐸必無錯失卽位爲右都管使宋還除登聞檢院同知鐸奏凡上訴者皆因尚書省斷不得直若復送省則必不行乞自宸衷斷之上以爲然詔登聞檢院凡上訴者自今每朝日奏十事永安元年詔刊定舊律鐸先奏名例一篇遷左諫議大夫出爲河東南路轉運使初置講義錢穀官十人鐸爲選首改中都路都轉運使四年遷戶部尚書鐸因轉對奏曰比年號令或已行而中輟或旣改而復行更張太煩百姓不信乞自今再三講究如有益于治則令在必行無恤小民之言頒行旣出尤當固守與國子司業紇石烈善才言

相合上然之泰和二年因議交鈔侍郎張復亨言三合同鈔可行鐸請廢不用詰難久之復亨議出上顧謂侍臣鐸剛正人也雖魏徵何加焉明年坐不得與孫卽康賈鉉同除叅政對客誦古詩惟有庭前老柏樹春風來似不曾來御史大夫卞効鐸怨望降河南府同知改彰化軍節度使七年拜叅知政事上怒左司郎中劉昂御史王宇劉國樞主事曹元員外李著徒單永康尚書省都事曹溫雄州都軍馬師周太倉使馬良顯刺史史肅唐括直思白蒲陰縣令大中私議朝政下獄鐸奏其不然但如鄭人游鄉校耳上悟悉薄其罪大安初遷尚書左丞兼修國史鐸言民間鈔多宜收斂院務課程及諸窠名錢盡令折鈔不拘貫例農民知之迤邐漸重比來州縣抑配行市買鈔無益徒擾之耳乞罷諸處鈔局惟省庫仍舊小鈔無限路分可令通行上

覽奏卽詔有司可速行之衛紹王立議誅黃門李新喜鐸曰此先朝任用太過王怪其何今日始言由是忤旨降濟州防禦使累安國絳陽軍節度使宣宗卽位召赴闕以道阻及遷汴乃上謁于宜材除太子太師有疾乞休累遣使候問貞祐三年卒與屯忠孝字全道本名牙哥懿州胡土虎猛安人幼孤事母孝大定二十二年登第調蒲州司候察廉遷校書郎兼太子司經又進禮部員外郎翰林待制權戶部侍郎佐叅政胥持國治決河以勞進階除河平軍節度使兼都木監因疏七祖佛河及王村周平道口雞爪孫家港復開東明南陽岡馬蹄孫村諸河壘石爲岸民不勝病改沁南軍坐前在衛州勾集妨農降寧海州刺史移滑州歷南京留守同知定國軍節度使入爲太子少傅兼禮部尚書貞祐初議降衛紹王與蒲察思忠阿附其議誣以

竊位降爲庶人頃之拜叅知政事二年三月中都閭急糧運道絕有詔搜括民粟悉令輸官酬以銀鈔或僧道戒牒時大典知府胥鼎已籍者先已具數未及入官忠孝復欲多得以明已功凡鼎所籍者不除其數民甚苦之諫議張行信疏論今米價踴貴無所從糴民糧止存兩月而又奪之使當絕食將不獨歸咎有司亦怨朝廷之不察也元兵在邇人心危懼若復無聊或生他變則所得不償所損矣宣宗善其言命近臣與忠孝同審處語以樞知卿盡心公務然國家本欲得糧今旣得矣姑從民便可也頃之行信復奏叅政忠孝矯僞不近人情急於功名詭異要與慘刻害物忍而不恤勾當河防河朔居民悉被其擾軍負民錢抑不令償自此假貸路絕軍民貧富不安其生又力薦胡沙虎後果作難猶自謂有功及議籍沒其子孫又云不當其偏

黨不公如此當此國家多事之時使此人與政如社稷何宣宗
曰朕初卽位當以禮進退大臣卿語其親知諷之求去可也把
胡魯以上意白忠孝覲然不聽罷爲太子太保出知濟南府改
中山府尋卒年七十諡忠敏 蒲察思忠本名畏也隆安路合
懶合兀主猛安人大定二十五年登第調文德郡陰二簿國子
助教應奉翰林文字太學博士累遷涿州刺史吏部郎中轉潞
王傅被詔與張行簡討論武成王廟配享等列不以世代爲先
後唐用李靖李勣居吳起樂毅之上聖朝太和太宗泰王宗翰
宋王宗望婁室咎神與前代之將各以功德間列可也其他論
列尚多以皆矯飾故不盡錄尋遷大理卿兼左司諫同修國史
泰和伐宋詔問備禦攻守之法議當選擇賢將宜攻宜守臨時
制變無不可者上以爲然頃之兼翰林侍講學士左諫議大夫

再閱月兼知審官院正職大理卿外兼四職。自思忠始宋人請和賜銀幣母憂起復轉侍讀學士兼兵部侍郎遷太子太保明昌二年春享太廟思忠攝太尉醉殿禮直官御史臺劾奏降祕書監終翰林學士

完顏弼本名訛出西南路猛安人與張翰俱登大定二十八年進士累調河東北路提刑司知事改遼州軍事同知名爲國史編修遷應奉翰林文字南京路轉運副使父憂起復太府監丞改吏部員外郎大安初除知登聞檢院累遷右司郎中翰林待制兼侍御史頃之遷禮部侍郎改東京副留守進隴州防禦安化軍節度使兼山東路統軍副使興定元年四月權元帥左都監行元帥府事和輯苗道潤移刺鐵哥軍事語在道潤傳十二月密州破爲亂軍所殺弼爲人敢爲大言作事誕妄時中都圍

急詔於東華門置招賢所內外士庶皆得言事寓薦細民王守信詔署行軍都統募市井無賴教閱爲兵進退跳擲大似童戲因與其衆出城殺百姓之樵採者以爲功又薦賈耐兒本岐路小說人但語詼嘲以取衣食製運糧車千兩徒費不貲時以材木艱得竊爲痛惜又薦草澤李棟在衛紹王時嘗事司天監李天惠依附天文假託占卜趨走貴臣嘗奏白氣貫紫微主京師兵亂幸不貫徹得不成禍旣而胡沙虎被殺宣宗益信之張行信奏易稱開國承家小人弗用聖人所以嚴戒後世今元兵縱橫人情洶懼應敵典理非賢智莫能任于庸流猥蒙拔擢叅預機務甚爲無謂司天之官占見天象據經陳奏使人主飭已修政轉禍爲福如有天象乞令諸監官公同陳奏所見或異則各以狀聞不宜偏聽上召近侍就決于高琪高琪言守信不可

用上始以行信之言爲然 張翰字林卿忻州秀容人調關州
軍事判官有誣昆弟三人行劫者廉得其狀白于州釋之歷東
勝義豐會川三令補尚書省令史除戶部主事遷監察御史母
憂服闋調山東路權鹽使父憂起復尚書省都事轉戶部員外
郎大安間充行省左右司郎中屢爭叅政承裕與平章獨吉思
忠論議不叶處置乖方多不見省及承裕就逮衛紹王知翰嘗
有言召見撫慰改知登聞鼓院遷侍御史貞祐初爲翰林直學
士充元帥府經歷官中都戒嚴調度方殷改戶部侍郎宣宗遷
汴翰規措扈從糧草至真定上言五事一日強本謂當募兵徒
徙豪民以實南京二曰足用謂當按募汴舊渠以通漕運三曰
防亂謂當就集義軍假之官印使相統攝以安反側四曰省事
謂縣邑不能自立者宜稍併之旣以省官且易於備盜五日推

恩謂當推恩以示天子所在稱幸之意上略施行之翰爲人雅有治劇才所至輒辦遷河平軍節度使改都木監提控軍馬使俄拜戶部尚書時初至南京庶事草略翰經度區處皆有條理是歲卒諡曰達義

任天寵字清叔曹州定陶人明昌二年進士調考城主簿遷威戎縣令縣故堡寨無文廟學舍以廢署創建置之有兄弟訟田者諭以理義委曲周至皆感泣而去遷泰定軍節度判官父憂服闋改崇義軍俄補尚書省令史右三部檢法司正遷監察御史改右司都事至員外郎拜左司諫歷左司郎中國子祭酒貞祐初轉秘書監兼吏部侍郎改中都路都轉運使時京師戒嚴糧運艱阻悉力營辦曲盡勞瘁出家貲以濟饑者全活甚衆御史高夔劉元規奉天寵等二十人公勤明敏有材幹可安集百

姓遷戶部尚書中都不守走南京中道遇兵而死諡曰純肅
獨吉思忠本名千家奴明昌六年爲行省都事累遷同簽樞密
院事承安三年除興平軍節度使改西北路招討使命增繕西
北屯戍及各邊堡牆西自坦舌東至胡烈么幾六百里上嘉其
勞賜詔獎諭曰直乾之維極邊之要正資守備以靖翰藩初大
定間工役促迫雖有墮垣無女牆別堤命卿督治用工七十五
萬惟用戍兵民不知勞矧時非淹久已臻休畢賴爾忠勤辦茲
心畫有嘉乃力式副予懷賜銀五百兩重幣十端入爲簽書樞
密院事轉吏部尚書拜叅知政事宋將渝盟大臣議者多言久
敗之國必不敢動思忠奏宋雖羈栖江表未嘗一日忘中國但
力不足耳其後果如其策七年正月紇石烈執中久圍楚州不
能下宰臣請命大臣節制其軍及益兵攻之思忠請行上以執

政將兵攻一小州克之不武乃用唐故事命充淮南宣慰使持
空名宣勅賞立功者既而宋來請和議寢頃之進尚書右丞
大安初拜平章政事三年與叅政承裕將兵屯邊方繕完烏沙
堡因不設備元兵奄至取烏月營思忠不能守坐除名解職衛
紹王命承裕行省已亦敗績于會河堡

納坦謀嘉上京路牙塔懶猛安人初習策論舉業大定二十六
年選入東宮教鄆王琮瀛王瓌讀書以終場舉人試補上京提
刑司書史廉能著稱承安元年契丹陀鎖寇掠韓與信州提刑
司問諸書史誰入奏者皆難之謀嘉請行五年特賜同進士出
身調東京教授湯池主簿太學助教母憂服闋累除翰林修撰
兼修起居注監察御史貞祐初遷吏部員外郎翰林待制侍御
史完顏寓舉其才行志在匡國可預軍政充元帥府經歷官中

都被圍嘗出已資以贍貧民時胥鼎奏准應計所贈還官謀竊不受事至危急輒憤帥臣統數萬衆不能出城一戰何如自縛請降耶宣宗議還都又言不可河南地狹土薄他日宋夏交侵河北非我有矣當還諸王分鎮遼東河南中都決不可去不聽頃之除唐州刺史入爲太常少卿兼左拾遺還鄭州防禦使敗左諭德少詹事權御史中丞未幾攝太子詹事興定元年潼關失守還河南統軍使兼昌武軍節度使攝許州行院簽樞汰去冗食軍士二千餘人上書諫伐宋不聽三年降潁州防禦使宋兵襲潁州聞其有備乃引去四年召爲翰林侍講學士兼兵部侍郎同修國史五年卒

把胡魯不詳其初起當宣宗南還由左諫議大夫與李英俱爲御前經歷官上面論此行軍馬朕自總之事有利害可因近侍

局以聞貞祐三年出爲彰化軍節度使兼涇州管內觀察使四年改知京兆府兼兵馬都總管充行省叅議官興定元年授陝西路統軍使二年召爲御史中丞三月拜叅知政事上言國家取人惟進士之選爲重不求備數務在得賢竊見今場會試考官取人泛濫非求賢之道宜革其弊依大定舊例行詔付尚書省集議從之六月詔權京兆行府左副元帥與胥鼎同事防秋鼎薦以爲過已遠甚欲以自代宣宗謂其人固佳至于駕馭人材處決機務不及鼎多三年六月平涼等處地震上言皇天不言以象告人災害之生必有其故乞明諭有司敬畏天戒上嘉納之遣右司諫郭著銜命撫諭軍民四年權京兆行省尚書右丞時陝西歲運糧以助關東民力寢困上從其議用舟楫自渭入河順流而下少紓民力時以爲便五年朝議欲復取會州以

臣竊計縱一月可拔猶當費米三萬石草九萬稱轉運丁夫十萬臨洮新遭劫掠瘡痍未復所須芻糧決不可辦取諸州郡亦恐未能又可更調十餘萬人以供餉乎政使此城必得不免留兵戍守是飛銳之役無時可已止宜令承裔軍于定西鞏州之地護民耕稼俟敵意怠然後取之詔付省院謂其言甚當從之又言自陝以西所置帥府有九其部衆率不過三四千而長校無多虛糜廩給甚爲無謂臣謂延安鳳翔鞏州邊隅重地固當仍舊德順平涼等處宜皆罷去河南行院帥府存沿邊並河者餘亦宜罷之制可是年十月西北兵三萬攻延安遣元帥合達并納合買住禦之孤城賴以保完元光元年屢請益兵上惡開之罷知河中府權安撫使陝西西路轉運使夾谷德新具奏此寔朝廷良臣去歲延安之功獨歸合達買住各授世封掌機政。

魯乃反見出竊謂方今用人之際使謀略之臣不獲展力緩急或失事機誠宜復之行省以勵衆心不報六月召爲大司農既至巡行郡縣上言羣盜擾攘侵及內地陳頴去京不遠四百里民居稀闊甫經大赦蔡息之間賊起益多驅牛焚舍恣行剽掠今向秋成田穀雖熟莫敢穫者朝廷不爲處置所在屯兵率無騎士比及報至賊已遁去叢薄深惡復難追襲徒存形跡而已八月復拜叅知政事諭以盜賊如何可息對曰悉以賦役繁多之故賦役省則盜賊息矣上曰朕固省之胡魯曰其如行院帥府擾民何哉上曰自今其令禁止之十二月進拜尚書右丞元光二年朝廷推其深悉利害遣往陝西與行省賽不合達從宜規畫元兵將還當審後圖正大元年進拜平章政事四月卒詔贈右丞相東平郡王胡魯廉直忠孝憂國忘家公家之事知無

不爲及沒朝宰公卿下迫吏民皆嗟惜之

師安石字子安清州人本姓尹避國諱改永安五年詞賦進士爲人輕財尚義初補尚書省令史以奉匄守承暉遺表問道走汴以聞宣宗嘉之擢爲樞密院經歷官時哀宗爲太子領院事遂見知迨元光二年累遷御史中丞上章言戰守避和四事所謂守者必求智謀之士使內足以得士卒之心外足以挫敵人之銳不惟彼不能攻又可以伺其隙而敗之其所謂和當使有司詳議漢唐以來計策而行今敵中來歸者頗多宜豐其糧餉厚其接遇度彼果肯爲我用擇有謀略者潛往以誘致其一來者旣衆彼必轉相猜貳然後徐起而圖之則中興之功不遠矣上嘉納之九月坐劾英王守純附奏不實決杖追官正大元年

驟蒙推用爲同簽樞密院事三年拜工部尚書權叅知政事四

年進尚書右丞五年論列近侍張文壽仁壽李麟之哀宗怒甚
詔責數百言至曰汝便承取賢相朕自爲昏主止矣安石遽遭
摧折疽發腦而死上復悼惜之

李復亨字仲修榮州河津人年十八登進士復中書判優等調
臨晉主簿護送官馬入府有盜殺馬不取度必有仇一人秦中
盛佩刀不服詰以刀峻馬血火煨之則刃背其人歛伏果與逆
旅主人有仇以提刑薦遷南和令又辨割民牛耳者察廉轉臨
洮府并陝西東路戶籍河東北路度支皆爲判官泰和中伐宋
充宣撫司經歷恐宋人乘虛掩襲南鄆故籍邊郡民爲軍俄遷
解鹽副使歷保大震武節度同知母憂起復遙授忻州刺史貞
祐間歷左司員外郎中翰林直學士行三司事興定三年大軍
已還從其請遣所籍咸歸本業因舉陳留縣令程震等二十九

人農桑有効。徵科均一。朝廷皆遷擢之。是歲七月。置京東西南三路行三司。掌勸農催租。軍須科差。及鹽鐵酒權等事。以攝西路。治河南戶部侍郎張師魯。攝東路。治歸德完顏麻斤。出攝南路。治許州三司使侯鑒。總之所奏民間銷毀農具。以供軍器。非便。其汝州魯山寶豐鄧州南皆產鐵。募工置冶。可以獲利。且不厲民。又奏陽武設賣鹽官。以佐軍用。禁止滄濱鹽。勿令過河。使河南食陽武解鹽。河北食滄濱鹽。南北俱濟。詔尚書省行之。以勸農有勞。遷兵部尚書。再閱月。轉吏部。時河南雨水害稼。拜爲宣慰使。循行郡縣。凡官吏貪污不治者。得廢罷。推治到任。復亨奏禁官吏會飲。罷民間差發養驛馬。最甚悉依舊設。回馬官官給使者食料。歲終會計。均賦於民。招河東河北移民耕種。河南閑田全免被災。及沿邊郡縣租稅。內地半之。以救塗炭之民。資

蓄積之用其南陽禾麥雖傷土性宜稻今因久雨乃更滋茂可增直糴稻給唐鄧軍食制皆可之無何被詔提控軍興糧草時河渡不通陝西鹽價踊貴乞以粟互易詔戶部從長規措當時服其有會計才。號能吏。故驟至通顯。四年三月拜叅知政事兼修國史。既執政頗矜持自營。譽望頓減。五年因監廷試謬放進士盧元及第奪其兩官。罷爲安國軍節度使。翰林待制崔禧歸德治中時。戡應奉翰林文字程嘉善俱奪三官降職。元光元年十一月城被復。亨自殺。年四十六。贈資德大夫知河中府事。赤蓋合喜性剛復好自用。宣宗以其有才幹任之。累遷蘭州刺史。提控軍馬。貞祐四年十一月夏騎四萬餘輦致攻具圍定西。將取其城。合喜及楊幹烈等率兵鏖戰走之。斬首二千級。俘獲人馬八百餘。器械稱是有功。遙授臨洮府同知。興定元年冬伐。

宋命權行元帥府駐來遠寨以張聲勢既而獲捷二年四月宋兵數千侵臨洮復擊走之斬獲甚衆遷元帥左都監行鞏州元帥府事四年夏人復來犯師次鹿兒原遣提控烏古論世鮮率偏師敗其千人都統王定亦破千五百衆于新泉城鞏爲帥府所在夏將你思丁兀名二人謀先下之則臨洮積石河洮諸城不攻自破故構宋統制程信等兵四萬同至合喜聞之飭兵嚴備一日十餘戰敵退據南岡選精兵三萬傅城又擊走之生擒夏將劉打甲玉等殺數千人攻益急將士殊死戰殺傷萬計敵自焚攻具拔柵遁去率兵蹶其後預先伏甲要地邀之斬首甚衆以功遙授平西軍節度使元光元年元將萌古不花攻鳳翔恐完顏仲元孤軍不足禦命令喜將兵援之二年木華黎國王糾里吉不花等及夏人步騎數十萬攻城甚急東自扶風岐山

西連汧隴數百里間營柵相望合喜盡力禦之論功加金紫光祿大夫升左監軍簽樞密院事特授大名府海谷忽申猛安哀宗卽位拜叅知政事權樞密副使嘗以守鳳翔自誇正大九年元兵進薄京師令守西北隅其地受攻最急語言失措面無人色凡經十六晝夜四月始罷內外死者以百萬計上方深以爲辱惟合喜自爲已功呼令史元好問何不入賀叅政思烈言城下之盟猶以爲恥今罷攻有何可賀合喜怒謂社稷不亡帝后免難何不爲喜近侍局直長張天任言不矜恥若是遂罷其樞密以失兵柄意殊不樂會有投匿名書於御路言與總帥撒合叅政訛出皆國賊朝廷不殺衆軍亦須殺之爲國除害撒合聞之飲藥死訛出稱疾不出惟合喜坦然若無事者上亦無所問自是軍國之事盡以決之復以爲樞密使統京城軍萬五千往

應思烈武仙授兵八月己酉朔駐於近郊三日聞思烈軍潰卽夜棄輜重馳還言者罪其始則抗命不此中則逗遛不進終則棄軍先遁不斬無以謝天下。祇加放免元將速不得遣人來招合喜卽治裝欲行世立邀餞于省驢以白金二百方對語適哀宗遣人自歸德持文書諭以卿朕老臣間雖廢山未嘗忘卿今崔立爲變若能反正與卿世襲公相立怒叱左右繫獄斬之

烏古論鎬本名栲栳東北路招討司人起家護衛累官慶陽總管天興初遷蔡息陳頴等州便宜總帥運米四百餘斛至歸德且請哀宗幸蔡上意遂決以蔡重鎮且慮有不測詔免鎬來拜爲御史大夫總帥如故時元兵去遠商販頗集小民鼓舞以爲復見太平進物者踵至鄆城土豪盧進殺其長吏自稱招撫使以前關陝帥府經歷范天保爲副至是來見進麥三百石及犂

鹿脯茶寮等物上賜進金牌加天保官鎬以上六宮散失左右無人令其妻選室女數人備後宮完顏仲德諫曰小民無知將謂陛下駐蹕以來不聞恢復遠略而先求處女以示久居不可不畏上從之止留解文義者一人餘皆放遣時從官近侍率皆窮乏意將取給於鎬以不能人滿其欲初言門禁甚嚴男女樵采以墨識面有錢出者十分取一雖以贍軍人多不便卽弛其禁久而日夕交譖以漸闕上供爲言召見特疎鎬自知被讒憂憤鬱抑常稱疾在告惟完顏仲德每見上必稱鎬功宜令叅預機務薦以自代上怒少解命權息州行省叅知政事蔡城破被執以招息州不下殺之